



Skowtu brey yu tyari yu na skowtu-oso efnoso wan tra presi pe den kan aksi yu sani, fu di wan bosroyti fu na Frubontu fu Europa Kondre (*Europese Unie efnoso EU*) kon na doro taki den e suku yu

Sranan Tongo

Wan fu den kondre di de ini a Frubontu fu Europa Kondre (EU) seni wan bosroyti kon na doro taki den e suku yu. A bosroyti disi den e kari *Europees aanhoudingsbevel*, san wani taki dati den tra EU kondre musu hori yu te den feni yu. Fu dati ede meki skowtu, Koninklijke Marechaussee efnoso wan tra orga san e suku sma di den denki du wan ogri, hori yu dan den tapu yu. A de prensari taki yu e frustan bun san na den leti di yu abi. Dati meki yu musu leysi a papira disi bun.

Fa sani o waka, san o pasa nanga yu

Skowtu brey yu tyari yu go na skowtu-oso. A ofsiri fu yustisia efnoso a yepi-ofsiri fu yustisia, sa teki bosroyti efu yu sa musu tan na skowtu oso. No moro langa leki dri dey den kan hori yu drape. Toku sonten a kan pasa taki ofsiri fu yustisia e bosroyti taki yu musu tan ete dri dey moro.

Ini den dri dey (ma no moro langa leki ini den siksi dey) yu sa musu go fesi a ofsiri fu yustisia efnoso a krutubasi-komsarsi na Amsterdam. A ofsiri fu yustisia efnoso krutubasi-komsarsi sa luku yu tori efu yu sa musu tan hori. Efu na so a bosroyti dan a sa meki den tyari yu fu skowtu-oso go na strafu-oso.

Ini siksitenti dey (ma no moro langa leki neygitenti dey) wan konmakandra sa hori na krutubangi na Amsterdam. A konmakandra disi sa opo gi inisuma di wani de drape. A konmakandra disi e hori fu luku yu tori taki efu yu sa gi abra na a wan kondre fu Europa Frubontu (EU) di aksi fu den hori yu, gi yu abra na den. Yu kan de na a krutubangi konmakandra disi, ma efu yu no wani so yu no abi fu de drape yusrefi: yu kan seni yu afkati fu go ini yu presi, e taki gi yu. Ma a winsi fa no fa, **yu abi a leti fu krutubangi na Amsterdam yere fu yu eygi mofo fa yu e syi a tori, san yu e denki.**

Baka tu wiki a krutubangi na Amsterdam sa teki a bosroyti efu den sa gi primisi fu a kondre di wani yu, sa kisi yu. Efu den gi primisi so tru dan ini tin dey yu sa tyari go gi abra na a EU kondre di e suku yu.

Fa sani kan waka moro syatu

San yu kan du owktu na taki yusrefi e agri fu a wan EU kondre di hori yu, gi yu abra na a EU kondre di seni suku yu. Efu na so dan a heri krutubangi konmakandra na Amsterdam no de fanowdu, sobun sani no abi fu go nanga langa. Disi e kari a 'syatu pasi'. Efu na disi yu wani dan yu sa abi fu no teki tumsi langa fu taigi krutubasi taki yu agri nanga den gi yu abra. Yu afkati kan de na yu sey, sorgu dati yu nanga en taki a tori finifini. Efu krutubasi agri nanga a gi abra fu yu fu a wan EU kondre go na a trawan, dan ini tin dey yu sa tyari go gi abra na a EU kondre di e suku yu.

Efu yu agri nanga yu gi abra, disi o pasa:

- Efu yu taigi krutubasi taki yu agri nanga yu gi abra yu no kan drai a tori moro;
- A EU kondre san e suku yu kan kragi yu efnoso tyari yu fesi krutubangi gi sani di no skrifi ini a bosroyti di den seni lontu taki fu san den e suku yu.

A de prensari fu yu taki ala sani nanga yu afkati finifini bifo yu agri fu yu gi abra na a kondre di e suku yu.

O sortu leti yu abi?

- Yu no abi fu piki te skowtu efnoso tra suma e aksi yu sani, disi den kari *zwijrecht*: yu abi a leti fu hori yu mofo no taki nèks;
- Yu abi a leti fu wan afkati de na yu sey fu e yepi yu;
- Yu abi a leti fu wan sma e fruteri yu ini yu eygi tongo san e taki di yu no e frustan, disi den kari wan tolk
- Yu abi a leti fu wan datra e luku yu efu yu no e firi bun

A leti fu hori yu mofo, no taki

No wan enkri momenti ini a heri tori disi yu de ferplekti fu taki wan wortu, efnoso fu fruteri yu sey fu a tori. Yu no abi fu piki te skowtu, (yepi-)ofsiri fu yustisia noso krutubasi e aksi yu sani.

Yu abi a leti fu wan afkati

Yu abi a leti fu wan afkati e yepi yu ini a krutu tori disi. Skowtu abi fu sorgu taki hesbiten baka den brey hori yu, yu sa man taki nanga wan afkati. Efu yusrefi sabi wan afkati keba di yu wani taki nanga en, dati bun owktu. Yu mu taigi den skowtu hesigauw efu wan spesrutu afkati de nanga san yu wani taki. A kan teki pkin ten bifo yu afkati kan doro na skowtu oso. A no musu teki moro langa leki tu yuru fosi a doro, ma a kan pasa taki a e doro moro lati.

Yu nanga yu afkati musu man taki fri, nanga furtrow. Yu afkati no mag fu taki yu tori nanga tra suma efu yu no gi en primisi. Yu kan kruderi nanga yu afkati no moro langi leki wan afu yuru bifo a ofsiri fu yustisia efnoso a yepi-ofsiri fu yustisia sa bosroyti efu yu abi fu tan na skowtu oso. A afkati abi primisi fu de nanga yu na a aksi-piki fu a (yepi-)ofsiri fu yustisia.

Yusrefi no abi fu pay a afkati. Ma efu yusrefi e bosroyti sortu afkati yu wani, dan sonleysi yusrefi sa abi fu pai en. Ala yu tori sa gi doro na a Raad voor Rechtsbijstand, a kantoro pe ala afkati nen skrifi.

Yu kan aksi a ofsiri fu yustisia owktu fu yu kan kisi yepi fu wan afkati ini a EU kondre srefi di e suku yu. A afkati fu a kondre dati kan kruderi nanga yu Holansi afkati fa krutu tori e waka ini a kondre di e suku yu, wani yu.

Skowtubasi fu a EU kondre san seni a *Europees Aanhoudingsbevel* fu piki den tra EU kondre taki den e suku yu, kan meki yu sabi san de fanowdu fu yu kan feni wan afkati ini a kondre dati. Ma disi yusrefi sa musu orga. Aksi yu Holansi afkati fu a yepi yu nanga dati.

San a afkati e du?

Yu afkati e hori baka gi yu, e tenapu gi yu fu yepi yu ini a heri tori fu a wan EU kondre e gi yu abra na a trawan di e suku yu, seni aksi fu yu. Sobun a de nanga yu ini a aksi-piki (san den e kari verhoor) fu skowtu, te yu musu kon fesi a ofsiri fu yustisia efnoso a krutubangi-komsarsi, nanga te yu musu kon fesi a krutubangi na Amsterdam.

A afkati:

- e broko gi yu fu yu frustan san o pasa, fa a heri skowtu- nanga krutu tori sa waka;
- e fruteri yu san na den leti di yu abi nanga san na yu ferplekti;
- e gi yu ray fa fu du nanga a ‘syatu pasi’;
- e gi yu ray ini ala skowtu- nanga krutu tori;
- e piki yu famiri, yu mati nanga yu basin a wroko pe yu de nanga san pasa nang yu (efu yu wani so);
- e taki nanga yu afkati ini a kondre di suku yu, aksi fu yu gi abra na den.

A leti fu yu kan kisi wan tolk: wan suma di e taki yu tongo

Efu yu no man taki efnoso frustan a Holansi tongo bun dan yu abi a leti fu yu kisi yepi fu wan *tolk*, wan suma di kan bodoy gi yu ini yu eygi mamatongo san e pasa. Taigi den skowtu efu yu no e frustan den bun, dan den kan seni kari wan tolk gi yu. A suma disi owktu kan yepi yu te yu musu taki nanga yu afkati. Sondro yu primisi a tolk no kan go taki yu tori nanga tra suma. Yu no abi fu pai wan tolk yusrefi.

A leti fu yu kisi datra sorgu

Yu abi a leti fu wan datra luku yu. Taigi den skowtu te yu no e firi bun, te yu wani taki nanga wan datra efnoso te yu abi datra sorgu fanowdu. Owktu a bun efu yu fruteri skowtu o sortu dresi yu e gebroyki efnoso yu abi fanowdu.

Tra leti

Yu abi a leti fu yusrefi owktu e kisi a papira fu a Frubontu fu Europa Kondre (Europese Unie efnoso EU) pe skrifi taki taki wan fu den kondre e suku yu, fu ini fu den kondre hori yu fu gi yu abra na akondre di e suku yu. A papira disi e kari *Europees aanhoudingsbevel*. Efu a skrifi ini wan tongo di yu no e frustan, yu abi a leti fu den prenspari sani ini a skrifi disi e poti gi yu ini yu eygi tongo.

Efu yu no abi a Holansi *nationaliteit*, san wani taki yu papira so leki yu *paspoort* de fu wan tra kondre, yu kan aksi skowtu fu den seni piki a ambassade fu a kondre pe yu komopo taki den hori yu.

Aksi de?

Yu abi aksi ete? Aksi yu Holansi afkati efnoso skowtu.

Kolofon

**Dis infomeshon sheet na poblakeshon fo di
Ministrio Jostis en Sikyuriti
PO Box 20301 | 2500 EH Di Hague**

Disemba 2022 | 22408855

Yu no go ebul fo get eni rayt from wetin de insay dis infomeshon pepa.

